

FIESTE PE PATRIE

3 avril 2007



Tai ultins agns il 3 di avrîl e je diventade une date impuartante pai furlans, une date che e à fat capî che al è fundamentâl, prime di cognossi la storie di altris, cognossi la proprie, valorizâ la proprie identitât di culture e di popul.

Il 03 di Avrîl al segne la nassite dal stât patriarcjâl furlan, un stât autonom, independent, un moment irripetibil te storie de nestre tiere. Clamante patrie, i furlans, no dan dome une conotazion teritoriâl ae lôr region, ma i dan un significât plui autentic e plui profund. Cun patrie si definîs une popolazion che e sint di fâ part di une coletivitât cuntun patrimoni culturâl, cuntune lenghe, cuntune religiositât e un spirt ben definîts.

Chest an, in cheste zornade, la Aministrazion Comunâl e à volût fâ fieste zontantsi a une schirie di Comuns e di ents sparniçâts sul teritori.

Partint dal fat che lis gnovis gjenerazions no cognossin la storie de proprie tiere, stant che sui libris di scuele, pôc o nuie al ven scrit rivuart ae storie dal Friûl, si è pensât di coinvolzi propit il “futûr” dal Friûl, sperant di promovi cussì une opare di sensibilizazion e di scuvierte des propiis lidrîs.

Lis manifestazions inmaneadis a àn duncje cjapât dentri i fruts des scuelis, dai plui piçui des maternis passant par chei des

elementârs fintremai ai zovins des medianis.

Pai frutins des maternis di Rualis e di Cividât e je stade inmaneade la proiezion, li de biblioteche, dal dvd Omenuts, carton animât de Fisher Price dopleât par furlan. Lis aventuris di Tonin, Miute, Lole, Pieri e Bete a son plasudis une vore ai piçui che no si son maraveâts denant di un carton animât cuntun codiç linguistic diferent dal chel che son usât a sintî: anzit al è stât capît benon in grazie di un lengaç une vore sempliç e di episodis simpatics ma tal stes timp educatîfs stant che a finivin ducj cuntun insegnament clâr: “par risolti i problemis al è miôr judâsi un cun chel altri”.

A la fin de proiezion a ducj i frutins son stâts consegnâts i gadgets di promozion de lenghe realizâts dal sportel pe lenghe furlane tant che: lapis colorâts, segnelibris e un poster realizât invezit de Provincie ai Udin. A cheste iniziative a àn partecipât cirche 120 piçui arlêfs des maternis.

Aes scuelis elementârs, invezit, al è stât fat recapitâ une vore di materiâl realizât dal sportel de lenghe furlane e da altris ents tant che la Universitât di Udin e la Provincie. Te zornade dal 03 di Avrîl ducj i arlêfs des scuelis elementâr a àn podût cussì vè in regâl penis, adesîfs, block notes, lapis, segnelibris... ducj cuntun

slogan par furlan.

Infin i arlêfs des scuelis medianis son stâts coinvoltis intune conference tal teatri Ristori tignude di un espert de Societât Filologjiche Furlane vignude dopo di une proiezion dal dvd: *Friûl viaç te storie: des origjins ae fin dal stât patriarcjâl*. Dvd moderni, completamenti par furlan, dât fûr de provincie di Udin che al è fat sul model dal documentaris de BBC. Il filmât al conte la storie de patrie dal Friûl dal moment de sô fondazion fintremai ae sô fin cu la rivade de republiche di Vignesie, il dut insiorât di ricostruzions storichis e aprofondiments. La conference e à tocjât i ponts fundamentâi de storie dal Friûl spiegant ancje quale che e je stade la evoluzion de lenghe furlane. Ancje ai arlêfs des medianis, plui di dusinte di lôr, no son mancjâts gadgets par furlan!

Po dopo, par ducj i citadins, te zornade dal 03 di Avrîl la biblioteche e je restade vierte dut il di. Ducj i utents a àn podût cjatâ in bieles mostre novitâts in lenghe furlane par grancj e piçui, dai gnûfs dizionaris specifics e manuâi aes contis e flabis.

Aes 19.00 sore sere, invezit, e je stade celebrade la messe par furlan tal domo di Sante Marie Assunte e par dut il di, difûr de sede municipâl, e svintulave cun braure la bandiere dal Friûl. ■